


'Affected Residents of Urirama' cu Caso Penal den Corte awe

Lucha pa para proyecto di molina na Urirama ta sigui



Zonidnan di turbinana di biento na Urirama compara cu e molinanan di biento na Vader Piet.

ORANJESTAD- Durante e ultimo lunanan e topico turbinanan di biento na Urirama ta hopi den noticia. Habitantenan di e Urirama en cuestion a lanta un comision pa asina bringa e proyecto di trece molinanan di biento den e area.

Na Aruba ya caba tin un windmolen park, cual ta situa na Vader Piet, na San Nicolaas. Eynan tin 10 molen poni. Loke por a compronde ta, cu e molinanan cu lo mester bin na Urirama, lo ta mucho mas grandi cu esunnan situa na

Vader Piet. Y mas importante, segun e habitantenan, ta cu e molinanan lo mester bin den e vecindario directo di e Kapel di Alto Vista.

Ta pa e hecho aki, residentenan di Urirama y Alto Vista, a lanta un comision Affected Residents Aruba (ARU) pa asina por bringa, den union contra di e proyecto aki.

Den e ultimo dianan, tabata tin varios debatenan publico den Parlamento, pa asina por discuti riba e tema aki, y tambe busca aprobacion pa cu e proyecto aki. tabata tin un

total di tres debate den Parlamento, di cual dos di nan tabata publico. Den e ultimo debate, emocionnan a bay halto, pa cual motibo Presidente di Parlamento a dicidi di schors e reunion. E di tres y ultimo debate, a wordo haci cu portanan cera. A prefera pa no laga publico drenta, p'asina no tin mas disturbionan den Parlamento y cu e reunion por a cana bon.

Un grupo yama Salba Urirama a entrega un manifesto na Parlamento, cual a wordo ricibi door di Juan David Irausquin pa asina toch por haya aprobacion di Parlamento, pa portanan wordo habri pa publico y duna nan participacion den e reunion. E peticion aki a wordo nenga y e reunion a sigui sin cu publico tabata presente.

E proyecto di Urirama a wordo aproba den Parlamento di Aruba, cu 12 voto na favor y 7 contra. Na momento di voto, e dos Parlamentarianan Independiente, Marisol Lopes-Tromp y Mervin Wyatt-Ras a bandona sala.

E siguiente mocionnan a wordo sometí na votacion den Parlamento.

1. Aprobacion Proyecto Windmolens/turbines Urirama, aproba 12 voto na favor y 7 contra.

2. Peticion pa tene referendum tocante Urirama a wordo nenga cu 7 voto na fa-



Turbinanan di 1.40m halto cu lo mester bin patras di e Kapel di Alto Vista.



Caminda pa Kapel di Alto Vista manera cu e ta actualmente.

bor y 14 contra.

3. Efectonan di Salud pa habitantenan di Urirama, rechasa cu nueve na favor y 12 contra.

4. Busca otro energianan alternativo sostenibel a wordo rechasa cu 7 na favor y 14 contra.

5. Spaans Lagoen lo cay bou beheer di Parke Arikok, a wordo aproba unanimamente.

6. Habitantenan cu bira malo pa motibo di efectonan di e molinanan, rechasa 6-15


7. Proyectonan den futuro lo mester wordo consulta prome cu habitantenan, aproba 15-5.

Pero e grupo aki ta nenga categoricamente di acepta e decision di Parlamento, y awo lo busca apoyo internacional pa cu nan causa. Parlamento no por garantisa cu e turbinanan di biento aki lo no tin niun efecto riba salud di e residentenan di e area en cuestion. E grupo no ta contra di ningun proyecto di energia alternativo, cual lo por yuda reduci e gastonan di awa y coriente pa e pueblo di Aruba. loke si nan ta contra di e, ta pakico mester bin precisamente

cu energia di biento? Pakico no ta busca otro recursonan cu ta mas den harmonia cu e cultura y naturalesa di Aruba. A recauda mas di 5 mil firma pa un peticion contra di e permiso pa construccion di e parke. Durante e reunion den Parlamento, Prome Minister di Aruba, Sr. Mike Eman, a bisa di lo tene na cuenta cualkier efectonan cu e turbinanan aki lo por tin riba salud y si esaki resulta di ta e caso, nan lo stop cu e proyecto. Segun e grupo aki, ta como si fuera cu e proyecto aki lo mester pasa, a toda costa.

Despues di e debate den Parlamento, a sigui varios reunionnan ariba e caso aki, y a yega na e conclusion cu lo pone 8 turbina na Urirama y 2 na Vader Piet. Esaki di tur manera, lo tin un efecto negativo riba nos medio ambiente, segun e grupo Affected Residents of Urirama.

Pa sigui busca nan derecho di bringa e proyecto di windmolen na Urirama, e asociacion Affected Residents of Urirama, a entama un caso den Corte di Husticia, cual caso lo tuma luga awe. □



Estudionan realisa ta indica cu lo mester mantene por lo menos 2 km di distancia for di e zona residencial.